

北
齊
書

列傳第二十八

北齊書三十六

隋太子通事舍人李

百藥

撰

邢邵

邢邵字子才河間鄴人魏太常貞之後父虬魏光祿卿小字吉少時有避遂不行名年五歲魏吏部郎清河崔亮見而竒之曰此子後當大成位望通顯十歲便能屬文雅有才思聰明彊記日誦萬餘言族兄巒有人倫鑒謂子弟曰宗室中有此兒非常人也少在洛陽會天下無事與

時名勝專以山水遊宴爲娛不暇勤業嘗因霖
雨乃讀漢書五日略能遍記之後因飲謔倦方
廣尋經史五行俱下一覽便記無所遺忘文章
典麗旣瞻且速季末二十名動衣冠嘗與右北
平陽固河東裴伯茂從兄杲河南陸道暉等至
北海王昕舍宿飲相與賦詩凡數十首皆在主人
奴處旦日奴行諸人求詩不得邵皆爲誦之諸
人有不認詩者奴還得本不誤一字諸人方之
王祭吏部尚書隴西李神雋大相欽重引爲忘年

之交釋巾爲魏宣武挽郎除奉朝請遷著作佐
郎深爲領軍元乂所禮乂新除遷尚書令神雋
與陳郡袁翻在席乂令邵作謝表須臾便成以
示諸賓神雋曰邢邵此表足使袁公變色孝昌
初與黃門侍郎李琰之對典朝儀自孝明之後
文雅大盛邵雕蟲之美獨步當時每一文初出
京師爲之紙貴讀誦俄遍遠近于時袁翻與范
陽祖瑩位望通顯文筆之美見稱先達以邵藻
思華贍深共嫉之每洛中貴人拜職多憑邵爲

謝表嘗有一貴勝初受官大集賓食翻與邵俱
在坐翻意主人託其為讓表遂命邵作之翻甚
不悅每告人去邢家小兒嘗客作章表自買黃
紙寫而送之邵恐為翻所害乃辭以疾屬尚書
令元羅出鎮青州啓為府司馬遂在青土終日
酣賞盡山泉之致永安初累遷中書侍郎所作
詔誥文體宏麗及爾朱兆入洛京師擾亂邵與
弘農楊愔避地嵩高山普泰中兼給事黃門侍
郎尋為散騎常侍太昌初勅令恒直內省給御

史令覆按尚書門下事凡除大官先問其可否
然後施行除衛將軍國子祭酒以親老還鄉詔所
在特給兵力五人并令歲一入朝以備顧問丁母憂哀
毀過禮後楊愔與魏收及邵請置學奏曰世室明
堂顯於周夏一黷兩學盛自虞殷所以宗配上帝以
著莫大之嚴宣布下土以彰則天之軌養黃髮以詢哲
言育青衿而敷教典用能享國長久風徽萬祀者
也爰暨亡秦改革其道坑儒滅學以蔽黔黎故
九服分崩祚終二代炎漢勃興更修儒術故西

京有六學之義東都有三本之盛逮自魏晉撥
亂相因兵革之中學校不絕仰惟高祖孝文皇
帝稟聖自天道鏡今古列校序於鄉黨敦詩書
於郡國但經始事敷戎軒屢駕未遑多就弓劍
弗追世宗統歷聿遵先緒永平之中大興板築
續以水旱戎馬生郊雖逮為山還停一簣而明堂
禮樂之本乃鬱荆棘之林膠序德義之基空盈牧
豎之跡城隍嚴固之重闕塼石之功墉構顯望
之要少樓榭之飾加以風雨稍侵漸致虧墜非

所謂追隆堂構儀刑萬國者也伏聞朝議以高祖大造區夏道侔姬文擬祀明堂式配上帝今若基址不脩仍同立畎即使高皇神享闕於國陽宗事之典有聲無實此臣子所以匪寧億兆所以佇望也臣又聞官方授能所以任事事既任矣酬之以祿如此則上無曠官之譏下絕尸素之謗今國子雖有學官之名無教授之實何異兔絲鷄麥南箕北斗哉昔劉向有言王者宜興辟雍陳禮樂以風天下夫禮樂所以養人刑

法所以殺人而有司勤勤請定刑法至於禮樂
則曰未敢是敢於殺人不敢於養人也臣以爲
當今四海清平九服寧晏經國要重理應先營
脫復稽延則劉向之言徵矣但事不兩興須有
進退以臣愚量宜罷尚方彫靡之作頗省永寧
土木之功并減瑤光材瓦之力兼分石窟鑿琢
之勞及諸事役非世急者一時農隙脩此數條
使辟雍之禮蔚爾而復興諷誦之音煥然而更
作美榭高墉嚴壯於外槐宮棘寺顯麗於中更

明古今重遵鄉飲敦進郡學精課經業如此則
元凱可得之於上序游夏可致之於下國豈不
休歟靈太后令曰配饗大禮爲國之本比以戎
馬在郊未遑脩繕今四表晏寧當勅有司別議
經始累遷太常卿中書監攝國子祭酒是時朝
臣多守一職帶領二官甚少邵頓居三職並是
文學之首當世榮之世宗幸晉陽路中頓有甘
露之瑞朝臣皆作甘露頌尚書符令邵爲之序
及文宣皇帝崩凶禮多見評訪勅撰哀策後授

特進平邵率情簡素內行脩謹兄弟親姻之間
稱爲雍睦博覽墳籍無不通曉晚年尤以五經
章句爲意窮其指要吉凶禮儀公私諮宣所質疑
去惑爲世指南每公卿會議事關典政邵援筆
立成證引該洽帝命朝章取定俄頃詞致宏遠
獨步當時與濟陰溫子昇爲文士之冠世論謂
之溫邢鉅鹿魏收雖天才艷發而年事在二人
之後故子昇死後方稱邢魏焉雖望實兼重不
以才位傲物脫略簡易不脩威儀車服器用充

事而已有齋不居坐卧恒在一小屋果餌之屬
或置之梁上賓至下而共敬天姿質素特安異
同士無賢愚皆能顧接對客或解衣不見蟲且與
劇談有書甚多而不甚讎校見人校書常笑曰何愚
之甚天下書至死讀不可遍焉能始復校此且誤
書思之更是一適妻弟李季節才學之士謂子
才曰世間人多不聰明思誤書何由能得子才
曰若思不能得便不勞讀書與婦甚踈未嘗內
宿自云嘗晝入內閣爲狗所吠言畢便撫手

大笑性好談賞又能閑獨公事歸休恒須賓客
自伴事寡嫂甚謹養孤子恕慈愛特深在兗州
有都信云恕疾便憂之廢寢食顏色貶損及卒
人士為之傷心痛悼雖甚音不再哭賓客吊慰
投淚而已其高情達識開遣滯累東吳以還所
未有也有集三十卷見行於世子大寶有文情
薛子大德大道略不識字焉

列傳第二十八

北齊書三十六

列傳第二十九

北齊書二十九

隋太子通事舍人李百藥

撰

魏收

魏收字伯起小字佛助鉅鹿下曲陽人也曾祖
緝祖韶父子建字敬忠贈儀同定州刺史收年
十五頗已屬文及隨父赴邊好習騎射欲以武
藝自達榮陽鄭伯調之曰魏郎弄戟多少收慙
遂折節讀書夏月坐板床隨樹陰諷誦積年板
床爲之銳減而精力不輟以文華顯初除太學

博士及爾朱榮於河陰濫害朝士收亦在園中
以日晏獲免吏部尚書李神雋重收才學奏授
司徒記室叅軍永安三年除北主客郎中節閔
帝立妙簡近侍詔試收爲封禪書收下筆便就
不立橐草文將千言所改無幾時黃門郎賈思
同侍立深竒之帝曰雖七步之才無以過此遷
散騎侍郎尋勅典起居注并修國史兼中書侍
郎時年二十六孝武初又詔收攝本職文誥填
積事咸稱旨黃門郎崔陵從齊神武入朝熏灼

於世收初不詣門悽爲帝登祚赦云朕託體孝
文收嗤其率直正負郎李愼以告之悽深憤忌
時節閔帝殂令收爲詔悽乃宣言收普泰世出
入幃幄一日造詔優爲詞旨然則義旗之士盡
爲逆人又收父老合解官歸侍南臺將加彈劾
賴尚書辛雄爲言於中尉綦儁乃解收有賤生
弟仲同先未齒錄因此怖懼上籍遣還鄉扶持
孝武嘗大發士卒狩於嵩少之南旬有六日時
天寒朝野嗟死帝與從官及諸妃主竒伎異飾

多非禮度收欲言則懼欲嘿不能已乃上南狩
賦以諷焉時年二十七雖富言淫麗而終歸雅
正帝手詔報焉其見褒美鄭伯謂曰卿不遇老
夫猶應逐兔初神武固讓天柱大將軍魏帝勅
收爲詔令遂所請欲加相國讓品秩收以實對
帝遂止收旣未測主相之意以前事不安求解
詔許焉久之除帝兄子廣平王赧開府從事中
郎收不敢辭乃爲庭竹賦以致己意尋兼中書
舍人與濟陰溫子昇河間邢子才齊譽世號三

才時孝武猜忌神武內有閒隙收遂以疾固辭
而免其舅崔孝芬怪而問之收曰懼有晉陽之
甲尋而神武南上帝西入關收兼通直散騎常
侍副王所使梁昕風流文辯收辭藻富逸梁主
及其羣臣咸加敬異先是南北初和李諧盧元
明首通使命二人才器並為鄰國所重至此梁
主稱曰盧李命世王魏中興未知後來復何如
耳收在館遂買吳婢入館其部下有買婢者收
亦喚取遍行姦穢梁朝館司皆為之獲罪人稱

其才而鄙其行在途作聘遊賦辭其美盛使還
尚書右僕射高隆之求南貨於昕收不能如志
遂諷御史中尉高仲密禁止昕收於其臺久之
得釋及孫寒死司馬子如薦收召赴晉陽以爲
中外府主簿以受旨乖忤頻被嫌責加以箠楚
久不得志會司馬子如奉使霸朝收假其餘光
子如因宴戲言於神武曰魏收天子中書郎一
國大才願大王借以顏色由此轉府屬然未甚
優禮收從叔季景有才學歷官著名並在收前

然收常所欺忽季景收初赴并頓丘李庶者故
大司農諧之子也以華辯見稱曾謂收曰霸朝
便有二魏收率爾曰以從叔見比便是耶輸之
比卿耶輸者故尚書令陳留公繼伯之子也愚
癡有名好自入市肆高價買物商賈共所嗤翫
收忽季景方之不遜例多如此收本以文才必
望穎脫見知位既不遂求修國史崔暹為三於
文襄曰國史事重公家父子霸王功業皆須具
載非收不可文襄啓收兼散騎常侍修國史武

定二年除正常侍領兼中書侍郎仍修史魏帝
宴百僚問何故名人曰皆莫能知收對曰晉議
郎董勛答問稱俗云正月一日爲鷄二日爲狗
三日爲猪四日爲羊五日爲牛六日爲馬七日
爲人時邢邵亦在側甚恐焉自爲魏梁和好書
下紙每云想彼境內寧靜此率土安和梁後使
其書乃彼自稱猶著此欲示無外之意收定報
書云想境內清晏今萬國安和梁人復書依以
爲體後神武入朝靜帝授相國固令收爲啟啓

成上王文襄時侍側神武指收曰此文當復爲
崔光四年神武於西門豹祠宴集謂司馬子如
曰魏收爲史官書吾善惡聞北伐時諸貴常餉
史官飲食司馬僕射頗曾餉不因共大笑仍謂
收曰卿勿見元康等在吾目下趨走謂吾以爲
勤勞我後世身名在卿手勿謂我不知尋加兼
著作郎收昔在洛京輕薄尤甚人號云魏收鷲
蛺蝶文襄曾遊東山令給事黃門侍郎顯等宴
文襄曰魏收恃才無宜適須出其短往復數番

收忽大唱曰楊遵彥理屈已倒惜從容曰我綽
有餘暇山立不動若遇當塗恐翩翩遂逝當塗
者魏翩翩者蛺蝶也文襄先知之大笑稱善文
襄又曰向語猶微宜更指斥惜應聲曰魏收在
并作一篇詩對衆讀訖云打從叔季景出六百
斛米亦不辨此遠近所知非敢妄語文襄喜昌
我亦先聞衆人皆笑收雖自申雪不復抗拒終
身病之侯景叛入梁寇南境文襄時在晉陽令
收爲檄五十餘紙不日而就又檄梁朝令送侯

景初夜執筆三更便成文過七紙文襄善之魏
帝曾季秋大射普令賦詩收詩末云尺書徵建
鄴折簡召長安文襄壯之顧諸人曰在朝今有
魏收便是國之光采雅俗文墨通達縱橫我亦
使子才子昇時有所作至於詞氣竝不及之吾或意
有所懷忘而不語語而不盡意有未及收呈草
皆以周悉此亦難有又勅兼主客郎接梁使謝
班徐陵侯景旣陷梁鄱陽王範時爲合州刺
史文襄勅收以書喻之範得書仍率部伍西上

刺史崔聖念入據其城文襄謂收曰今定一州卿
有其力猶恨尺書徵建鄴未効耳文襄崩文宣
如晉陽令與黃門郎崔季舒高德正吏部郎中
尉瑾於北第掌機密轉祕書監兼著作郎又除
定州大中正時齊將受禪楊愔奏收置之別館
令撰禪代詔冊諸文遣徐之才守門不聽出天
保元年除中書令仍兼著作郎封富平縣子三
年詔撰魏史四年除魏尹故優以祿力專在史
閣不知部事初帝令羣臣各言爾志收曰臣願

得直筆東觀早成魏書故帝使收專其任又詔
平原王高隆之摠監之署名而已帝勅收曰好直
筆我終不作魏太武誅史官始魏初鄧彥撰代
記十餘卷其後崔浩典史游允程駿李彪崔光
李琰之徒和世修其業浩爲編年體彪始分作
紀表志傳書猶未出宣武時命邢巒追撰孝文
起居注書太和十四年又命崔鴻王遵業補續
焉下訖孝明事甚委悉濟陰王暉業撰辨宗室
錄三十卷收於是部通直常侍房延祐司空司

馬辛元植國子博士刁柔裴昂之尚書郎高孝
幹專摠斟酌以成魏書辨定名稱隨條甄舉又
搜採亡遺綴續後事備一代史籍表而上聞之
勒成一代大典凡十二紀九十二列傳合二百
一十卷五年三月奏上之秋除梁州刺史收以
志未成奏請終業許之十一月復奏十志天象
四卷地形三卷律曆二卷禮樂四卷食貨卷
刑罰一卷靈徵二卷官氏二卷釋老一卷凡二
十卷續於紀傳合一百三十卷分爲十二帙其

史三十五例二十五序九十四論前後二表一
啓焉所引史官恐其凌逼唯取學流先相依附
者房延祐平元植睦仲讓雖夙涉朝位並非史
才刁柔裴昂之以儒業見知全不堪編緝高孝
幹以左道求進修史諸人祖宗姻戚多被書錄
飾以美言收頗急不甚能平夙有怨者多沒其
善每言何物小子敢共魏收作色舉之則使上
天按之當使入地初收在神武時爲太常少卿
修國史得陽休之助因謝休之曰無以謝德當

爲卿作佳傳休之父固魏世爲北平太守以貪
虐爲中尉李平所彈獲罪載在魏起居注收書
云固爲北平甚有惠政坐公事免官又云李平
深相敬重爾朱榮於魏爲賊收以高氏出自爾
朱且納榮子金故減其惡而增其善論云若修
德義之風則韋彭伊霍夫何足數時論旣言收
著史不平文宣詔收於尚書省與諸家子孫共
加論討前後投訴百有餘人云遺其家世職位
或云其家不見記錄或云妄有非毀收皆隨狀

荅之范陽盧斐父同附出族祖立傳下頓丘李
庶家傳稱其本是梁國家人斐庶譏議云史書
不直收性急不勝其憤啓誣其欲加屠害帝大
怒親自詰責斐曰臣父仕魏位至儀同功業顯
著名聞天下與收無親遂不立傳博陵崔綽位
止本郡功曹更無事迹是收外親乃為傳首收
曰綽雖無位名義可嘉所以合傳帝曰卿何由
知其好人收曰高允曾為綽讚稱有道德帝曰
司空才士為人作讚正應稱揚亦如卿為人作

文章道其好者豈能皆實收無以對戰慄而已
但帝先重收才不欲加罪時太原王松年亦謗
史及斐庶並獲罪各被鞭配甲坊或因以致死
盧思道亦抵罪然猶以羣口沸騰勅魏史且勿
施行令羣官博議聽有家事者入署不實者陳
牒於是衆口誼然號爲穢史投牒者相次無以
抗之時左僕射楊愔右僕射高德正二人勢傾
朝野與收皆親收遂爲其家竝作傳二人不欲
言史不實抑塞訐辭終文宣世更不重論又尚

書陸操嘗謂愔曰魏收魏書可謂博物宏才有
大功於魏室愔謂收曰此謂不刊之書傳之萬
古但恨論及諸家枝葉親姻過爲繁碎與舊史
體例不同耳收曰往因中原喪亂人士譜牒遺
逸略盡是以具書其支派望公觀過知仁以免
尤責八年夏除太子少傅監國史復參議律令
三臺成文宣曰臺成須有賦愔先以告收收上
皇居新殿臺賦其文甚壯麗時所作者自邢邵
已下咸不逮焉收上賦前數日乃告邵邵後告

三十四
人曰收甚惡人不早言之帝曾遊東山勅收作
詔宣揚威德譬喻關西俄頃而訖詞理宏壯帝
對百寮大嗟賞之仍兼太子詹事收娶其舅女
崔昂之妹產一女無子魏太常劉芳孫女中書郎
崔肇師女夫家坐事帝並賜收爲妻時人比之
賈充置左右夫人然無子後病甚恐身後嫡媵
不平乃殺二姬及疾瘵追憶作懷離賦以申意
文宣每以酣宴之次云太子性懦宗社事重終
當傳位常山收謂楊愔曰古人云太子國之根

本不可動搖至尊三爵後每言傳位常山令臣
下疑貳若實便須決行此言非戲魏收既忝師
傅正當守之以死但恐國家不安惜以收言白
於帝自此便止帝數宴喜收每預侍從皇太子
之納鄭良娣也有司備設牢饌帝既酣飲起而
自毀覆之仍詔收曰知我意不收曰臣愚謂良
娣既東宮之妾理不須牢仰惟聖懷緣此毀去
帝大笑握收手曰卿知我意安德王延宗納趙
郡李祖收女為妃後帝幸李宅宴而妃母宋氏

薦二石榴於帝前問諸人莫知其意帝投之收
曰石榴房中多子王新妃母欲子孫衆多帝大
喜詔收卿還將來仍賜收美錦二疋十年除儀
同三司帝在宴席口勅以爲中書監命中書郎
李愔於樹下造詔愔以收一代盛才難於率爾
久而未訖比成帝已醉醒遂不重言愔仍不奏
事竟寢及帝崩於晉陽驛召收及中山太守陽
休之參議吉凶之禮并掌詔誥仍除侍中遷太
常卿文宣謚及廟號陵名皆收議也及孝昭居

中宰事命收禁中爲諸詔文積日不出轉中書
監皇建元年除兼侍中右光祿大夫仍儀同監
史收先副王昕使梁不相協睦時昕弟晞親密
而孝昭別令陽休之兼中書在晉陽典詔誥收
留在鄴蓋晞所爲收大不平謂太子舍人盧詢
祖曰若使卿作文誥我亦不言又除祖珽爲著
作郎欲以代收司空主簿李翥文詞士也聞而
告人曰詔誥悉歸陽子烈著作復遣祖孝徵文
史頓失恐魏公發背於時詔議二王三恪收執

王肅杜預義以元司馬氏爲二王通曹備三恪
詔諸禮學之官皆執鄭立五代之議孝昭后姓
元議恪不欲廣及故議從收又除兼太子少傅
解侍中帝以魏史未行詔收更加研審收奉詔
頗有改正及詔行魏史收以爲直置祕閣外人
無由得見於是命送一本付并省一本付鄴下
任人寫之大寧元年加開府清河二年兼右僕
射時武成酣飲終日朝事專委侍中高元海元
海凡庸不堪大任以收字名振俗都官尚書畢

義雲長於斷割乃慮倚仗收畏避不能匡救
爲議者所譏帝於華林別起立洲苑備山水臺
觀之麗詔於閣上畫收其見重如此始收與溫
子昇邢邵稍爲後進邵旣被踈出子昇以罪幽
死收遂大被任用獨步一時議論更相訾毀各
有朋黨收每議陋邢邵文邵又云江南任昉文
體本踈魏收非直模擬亦大偷竊收聞乃曰伊
常於沈約集中作賊何意道我偷任昉任沈俱
有重名邢魏各有所好武平中黃門郎顏之推

以二公意問僕射祖珽珽答曰見邢魏之臧否
即是任沈之優劣收以溫子昇全不作賦邢雖
有一兩首又非所長常云會須作賦始成大才
士唯以章表碑誌自許此外更同兒戲自武定
二年已後國家大事詔命軍國文詞皆收所作
每有愷言急受詔兵成或時中使催促收筆下有
同宿構敏速之工邢溫所不逮其參議典禮與
邢相埒旣而趙郡公增年獲免收知而過之事發
除名其年又以託附陳使封孝琰牒令其門客

與行遇崐崙舶至得竒貨裸然禡表美玉盈尺
等數十件罪當流以贖論三年起除清都尹尋
遣黃門郎元文遙勅收曰卿舊人事我家最久
前者之罪情在可恕比令卿爲尹非謂美授但
初起卿斟酌如此朕豈可用卿之才而忘卿身
待至十月當還卿開府天統元年除左光祿大
夫二年行齊州刺史尋爲真收以子姪少年申
以戒厲著枕中篇其詞曰吾嘗覽管子之書其
言曰任之重者莫如身途之畏者莫如口期之

遠者莫如年以重任行畏途至遠期惟君子爲
能及矣追而味之喟然長息若夫岳立爲重有
潛戴而不傾山藏稱固亦趨負而弗停呂梁獨
浚能行歌而匪惕焦原作險或躋踵而不驚九
陔方集故眇然而迅舉五紀當定想宵乎而上
征苟任重也有度則任之而愈固乘危也有術
蓋乘之而靡恤彼其遠而能通果應之而可必
豈神理之獨爾亦人事其如一嗚呼處天壤之
間勞死生之地攻之以嗜欲牽之以名利梁肉

不期而共臻珠玉無足而俱致於是乎驕奢仍
作危亡旋至然則上知大賢唯幾唯哲或出或
處不常其節其舒也濟世成務其卷也聲銷迹
滅玉帛子女椒蘭律呂諂諛無所先稱肉度骨
膏脣挑舌死惡莫之前勲名共山河同久志業
與金石比堅斯蓋厚棟不撓遊刃若然逮於厥
德不常喪其金璞馳騖驚人世鼓動流俗挾湯日
而謂寒包嶮壑而未足源不清而流濁表不端
而影曲嗟乎膠漆謂堅寒暑甚促反利而成害

化榮而就辱欣戚更來得喪仍續至有身禦魑
魅蒐沉狴獄詎非足力不彊迷在當局孰可謂
車戒前傾人師先覺聞諸君子雅道之士遊遨
經術馱餒文史筆有竒鋒談有勝理孝悌之至
神明通矣審道而行量路而止自我及物先人
後己情無繫於榮悴心靡滯於愠喜不養望於
丘壑不待價於城市言行相顧慎終猶始有一
於斯鬱爲羽儀恪居展事知無不爲或左或右
則髦士攸宜無悔無吝故高而不危異乎勇

志退苟得患失射千金之產邀萬鍾之秩投烈
風之門趣炎火之室載蹶而墜其貽宴或躡乃
喪其貞吉可不畏歟可不戒歟門有倚禍事不
可不密墻有伏寇言不可而失宜諦其言宜端
其行言之不善行之不正鬼執彊梁人囚徑廷
幽奪其魄明天其命不服非法不行非道公鼎
爲己信私玉非身寶過淄爲紺踰藍作青持繩
視直置水觀平時然後取未若無欲知止知足
庶免於辱是以爲必察其幾舉必慎於微知幾

慮微斯亡則稀既察且慎福祿攸歸昔蘧瑋識
四十九非顏子隣幾三月不違跬步無已至於
千里覆一蕘進及於萬仞故云行遠自卑可大
可久與世推移月滿如規後夜則虧槿榮于枝
望暮而萎夫奚益而非損孰有損而不害益不
欲多利不欲大唯居德者畏其甚體真者懼其
大道遵則羣謗集任重而衆怨會其達也則尼
父栖遑其忠也而周公狼狽無曰人之我狹在
我不可而覆無曰人之我厚在我不可而咎如

山之大無不有也如谷之虛無不受也能剛能
柔重可負也能信能順險可走也能知能愚期
可以也周廟之人三緘其口漏卮在前欹器留
後俾諸來裔傳之坐右其後羣臣多言魏史不
實武成復勅更審收又回換遂爲盧同立傳崔
綽返更附出楊愔家傳本云有魏以來一門而
已至是加此八字又先云弘農華陰人乃改自
云弘農以配王惠龍自云太原人此其失也尋
除開府中書監武成崩未發喪在內諸公以後

主即位有年疑於赦令諸公引收訪焉收固執
宜有恩澤乃從之掌詔誥除尚書右僕射摠議
監五禮事位特進收奏請趙彥深和士開徐之
才共監先以告士開士開驚辭以不學收曰天
下事皆由王五禮非王不決士開謝而許之多
引文士令執筆儒者馬敬德熊安生權會實全
之武平三年薨贈司空尚書左僕射謚文貞有
集七十卷收碩學大才然性褊不能達命體道
見當途貴遊每以言色相悅然提獎後輩以名

行爲先浮華輕險之徒雖有才能弗重也初河
間邢子才及季景與收竝以文章顯世稱大邢
小魏言尤俊也收少子才十歲子才每曰佛助
寮人之偉後收稍與子才爭名文宣貶子才曰
爾才不及魏收收益得志自序云先稱温邢後
曰邢魏然收內陋邢心不許也收旣輕疾好聲
樂善胡舞文宣末數於東山與諸優爲獼猴與
狗鬪帝寵狎之收與外兄博陵崔巖嘗以雙聲
嘲收曰愚魏衰收收蒼白顏巖腥瘦是誰所生

羊頤猶頰頭團臯平飯房笊籠着孔朝訂其辯
捷不拘若是既緣史筆多憾於人齊亡之歲收
冢被發棄其骨于外先養弟子仁表為嗣位至
尚書膳部郎中隋開皇中卒於溫縣令

列傳第二十九

北齊書三十七

此傳與北史同但不序世家又無論贊疑非

正史

列傳第三十

北齊書三十八

隋太子通事舍人李

百藥

撰

辛術

元文遙

趙彥深

辛術字懷哲少明敏有識度解褐司空曹曹參
軍與僕射高隆之共典營構鄴都宮室術有思
理百工克濟再遷尚書右丞出爲清河太守政
有能名追授并州長史遭父憂去職清河父老

數百人詣闕請立碑頌德文襄嗣事與尚書左
丞宋遊道中書侍郎李繪等並追詣晉陽俱爲
上客累遷散騎常侍武定八年侯景叛除東南
道行臺尚書封江夏縣男與高岳等破侯景擒
蕭明遷東徐州刺史爲淮南經略齊天保元年
侯景徵江西租稅術率諸軍度淮斷之燒其稻
數百萬石還鎮下邳人隨術北渡淮者三千餘
家東徐州刺史郭志殺郡守文宣聞之勅術自
今所統十餘州地諸有犯法者刺史先啓聽報

以下先斷後表聞齊代行臺兼摠人事自術始也安州刺史臨清太守盱眙斬城二鎮將犯法術皆案奏殺之睢州刺史及所部郡守俱犯大辟朝廷以其奴婢百口及資財盡賜術三辭不見許術乃送詣所司不復聞邢邵聞之遺術書曰昔鍾離意云孔子忍渴於盜泉便以珠璣委地足下今能如此可謂異代一時及王僧辯破侯景術招攜安撫城鎮相繼款附前後二十餘州於是移鎮廣陵獲傳國璽送鄴文宣以璽告

於太廟此璽即秦所制方四寸上紐交盤龍其
文曰受命于天既壽永昌二漢相傳又傳魏晉
懷帝敗沒於劉聰聰敗沒於石氏石氏敗晉穆
帝永和中濮陽太守戴僧施得之遣督護何融
送于建鄴歷宋齊梁梁敗侯景得之景敗侍中
趙思賢以璽投景南兗州刺史郭元建送于術
故術以進焉尋徵爲殿中尚書領太常卿仍與
朝賢議定律令遷吏部尚書食南兗州梁郡幹
遷鄴以後大選之職知名者數四五有得失未

能盡美文襄帝少年高朗所弊者踈袁叔德沉
密謹厚所傷者細楊愔風流辨給取士失於浮
華唯術性尚貞明取士以才器循名責實新舊
參舉管庫必擢門闕不遺考之前後銓衡在術
最爲折衷甚爲當時所稱舉天保末文宣嘗令
術選百負官參選者二三千人術題目士子人
無謗讟其所旌擢後亦皆致通顯術清儉寡嗜
愆勤於所職未嘗暫懈臨軍以威嚴牧人有惠
政少愛文史晚更修學雖在戎旅手不釋卷及

定淮南凡諸資物一毫無犯唯大收典籍多是
宋齊梁時佳本鳩集萬餘卷并顧陸之徒名畫
二王已下書法數亦不少俱不上王府唯入私
門及還朝頗以饋遺權要物議以此少之十年
卒年六十皇建二年贈開府儀同三司中書監
青州刺史子閣卿尚書郎閣卿弟衡卿有識學
開府參軍事隋大業初卒於太常丞

元文遙字德遠河南洛陽人魏昭成皇帝六世
孫也五世祖常山王遵父晞有孝行父卒廬於

墓側而終文遙貴贈特進開府儀同三司中書
監諡曰孝文遙敏惠夙成濟陰王暉業每云此
子王佐才也暉業嘗大會賓客有人將何遜集
初入洛諸賢皆贊賞之河間邢邵試命文遙誦
之幾遍可得文遙一覽便誦時年十餘歲濟陰
王曰我家千里駒今定如何邢云此殆古未有
起家負外散騎常侍遭父喪服闋除太尉東閣
祭酒以天下方亂遂解官侍養隱於林慮山武
定中文襄徵爲大將軍府功曹齊受禪於登壇

所受中書舍人宣傳文武號令楊遵彥每云堪
解穰侯印者必在斯人後忽被中旨幽執竟不
知所由如此積年文宣後自幸禁獄執手愧謝
親解所着金帶及御服賜之即日起爲尚書祠
部郎中孝昭攝政除大丞相府功曹參軍典機
密及踐祚除中書侍郎封永樂縣伯參軍國大
事及帝大漸與平秦王歸彥趙郡王叡等同受
顧託迎立武成即位任遇轉隆歷給事黃門侍郎
散騎常侍侍中中書監天統二年詔特賜姓高

氏籍屬宗正第依例歲時入朝再遷尚書左僕射進
封寧都郡公侍中文遙歷事三主明達世務每臨
軒多命宣勅號令文武聲韻高朗發吐無滯然探
測上旨時有委巷之言故不爲知音所重齊因魏
朝宰縣多用廝濫至於士流恥居百里文遙以縣
令爲字人之切遂請革選於是密令搜揚貴游子
弟發敕用之猶恐其披訴摠召集神武門令趙
郡王叡宣旨唱名厚加慰喻士人爲縣自此始也
旣與趙彥深和士開同被任遇雖不如彥深清貞

守道又不爲士開貪淫亂政在於孟季之間然
性和厚與物無競故時論不在彥深之下初文遙
自洛遷鄴惟有地十頃家貧所資衣食而已魏之
將季宗姓被侮有人冒相侵奪文遙即以與之及
貴此人尚在乃將家逃竄文遙大驚追加慰撫還
以與之彼人愧而不受彼此俱讓遂爲閑田至後
主嗣位趙郡王叡婁定遠等謀出和士開文遙
亦參其議叡見殺文遙由是出爲西兗州刺史
詣士開別士開曰處得言地使元家兒作令僕

深媿朝廷旣言而悔仍執手慰勉之猶慮文遙自
疑用其子行恭爲尚書郎以慰其心士開死自東
徐州刺史徵入朝竟不用卒行恭美姿貌有父風
兼俊才位中書舍人待詔文林館齊亡陽休之
等十八人同入開府稍遷司勳下大夫隋開皇中
位尚書郎坐事徙瓜州而卒行恭少頗驕恣文遙令
與范陽盧思道交遊文遙嘗謂思道云小兒比日
微有所知是大弟之力然白擲劇飲甚得師風思
道蒼云郎辭情俊邁自是克荷堂構而白擲劇飲

亦天性所得行恭弟行如亦聰慧早成武平末任著作佐郎
趙彥深自云南陽宛人漢大傅喜之後高祖父難
爲清河太守有惠政遂家焉清河後改爲平原
故爲平原人也本名隱避齊廟諱改以字行父
奉伯仕魏位中書舍人行洛陽令彥深貴贈
司空彥深幼孤貧事母甚孝年十歲曾候司
徒崔光光謂賓客曰古人觀眸子以知人此人當
必遠至性聰敏善書計安閑樂道不雜交遊爲
雅論所歸服昧爽輒自掃門外不使人見率以

爲常初爲尚書令司馬子如賤客供寫書子如
善其無誤欲將入觀省舍隱靴無氈衣帽穿弊
子如給之用爲尚書令史月餘補正令史神武
在晉陽索三史子如舉彥深後拜子如開府參
軍超拜水部郎及文襄爲尚書令令選沙汰諸
曹郎隱以地寒被出爲滄州別駕辭不行子如
言於神武徵補大丞相功曹參軍專掌機密文
翰多出其手稱爲敏給神武曾與對坐遣造
軍令以手捫其額曰若天假卿年必大有所至

每謂司徒孫騰曰彥深小心恭慎曠古絕倫及
神武崩祕喪事文襄慮河南有變仍自巡撫乃
委彥深後事轉大行臺都官郎中臨發握手泣
曰以母弟相託幸得此心既而內外寧靜彥深
之力及還發喪深加褒美乃披郡縣簿爲選封
安國縣伯從征潁川時引水灌城城雉將沒西
魏將王思政猶欲死戰文襄令彥深單身入城
告喻即日降之便手牽思政出城文襄謂彥深
曰吾昨夜夢獵遇一羣豕吾射盡獲之獨一大

豕不可得卿言當為吾最須吏獲豕而進至是
文襄笑曰夢驗矣即解思政佩刀與彥深曰使
卿常獲此利文宣嗣位仍典機密進爵為侯天
保初累遷祕書監以為忠謹每郊廟必令兼太
僕卿執御陪乘轉大司農帝或巡幸即輔贊太
子知後事出為東南道行臺尚書徐州刺史為
政尚恩信為吏人所懷多所降下所營軍處士
庶追恩號趙行臺頓文宣爾書勞勉徵為侍中
仍掌機密河清元年進爵安樂公累遷尚書左

僕射齊州大中正監國史遷尚書令為特進封
宜陽王武平二年拜司空為祖珽所間出為西
兗州刺史四年徵為司空轉司徒丁母憂尋起
為本官七年六月暴疾薨時年七十彥深歷事
累朝常參機近溫柔謹慎喜怒不形於色自皇
建以還禮遇稍重每有引見或外御榻常呼官
號而不名也凡諸選舉先令銓定提獎人物皆
行業為先輕薄之徒弗之齒也孝昭既執朝權
羣臣密多勸進彥深獨不致言孝昭嘗謂王晞

云若言衆心皆謂天下有歸何不見彥深有語
晞以告彥深不獲已陳請其爲時重如此常遜
言恭己未嘗以驕矜待物所以或出或處去而
復還母傅氏雅有操識彥深三歲傅便孀居家
人欲以改適自誓以死彥深五歲傅謂之曰家
貧而小何以能濟彥深泣而言曰若天哀矜兒
大當仰報傅感其意對之流涕及彥深拜太常
卿還不脫朝服先入見母跪陳幼小孤露蒙訓
得至於此母子相泣久之然後改服後爲宜陽

國太妃彥深有七子仲將知名仲將沉敏有父
風溫良恭儉雖對妻子亦未嘗怠慢終日儼然
學涉羣書喜草隸雖與弟書書字楷正云草不
可不解若施之於人即似相輕易若與當家中
卑幼又恐其疑所在宜爾是以必須隸筆彥深
乞轉以萬年縣子授之位給事黃門侍郎散騎
常侍隋開皇中位吏部郎終於安州刺史齊朝
宰相善始令終唯彥深一人然諷朝廷以子叔
堅爲中書侍郎頗招物議時馮子琮子慈明祖

班子君信並相繼居中書故時語云馮祖及趙
穢我鳳池然叔堅身材最劣

列傳第三十

北齊書三十八

此卷與北史同

列傳第三十一

北齊書二十九

隋太子通事舍人李

百藥

撰

崔季舒

祖班

崔季舒字叔正博陵安平人父瑜之魏鴻臚卿
季舒少孤性明敏涉獵經史長於尺牘有當世
才具年十七爲州主簿爲大將軍趙郡公琛所
器重言之於神武神武親簡丞郎補季舒大行
臺都官郎中文襄輔政轉大將軍中兵參軍甚

見親寵以魏帝左右頃置腹心擢拜中書侍郎
文襄爲中書監移門下機事摠管歸中書又季
舒善音樂故內伎亦通隸焉內伎屬中書自季舒
始也文襄每進書魏帝有所諫請或文辭繁雜
季舒輒脩飾通之得申勸戒而已靜帝報荅霸
朝恒與季舒論之云崔中書是我姝母轉黃門
侍郎領主衣都統雖迹在魏朝而心歸霸府密
謀大計皆得預聞於是賓客輻湊傾心接禮甚
得名譽勢傾崔暹暹嘗於朝堂屏人拜之曰暹

若得僕射皆叔父之恩其權重如此時勲貴多
不法文襄無所縱捨外議以季舒及崔暹等所
爲甚被怨疾及文襄遇難文宣將赴晉陽黃門
郎楊休之勸季舒從行曰一日不朝其間容刀
季舒性愛聲色心在閑放遂不請行欲恣其行
樂司馬子如緣宿憾及尚食典御陳山提等共
列其過狀由是季舒及暹各鞭二百徙北邊天
保初文宣知其無罪追爲將作大匠再遷侍中
俄兼尚書左僕射儀同三司大被恩遇乾明初

楊愔以文宣遺旨停其僕射遭母喪解任起服
除光祿勳兼中兵尚書出為齊州刺史坐遣人
渡淮平市亦有贓賄事為御史所劾會赦不問
武成居藩曾病文宣令季舒療病備盡心力大
寧初追還引入慰勉累拜度支尚書開府儀同
三司昭陽殿勅令監造以判事式為胡長仁密
言其短出為西兗州刺史為進典籤於吏部被
責免官又以詣廣寧王宅決馬鞭數十及武成
崩不得預於哭泣久之除膠州刺史遷侍中開

府食新安河陰二郡幹加左光祿大夫待詔文
林館監撰御覽加特進監國史季舒素好圖籍
暮年轉更精勤兼推薦人士獎勸文學時議翕
然遠近稱羨祖珽受委奏季舒摠監內作珽被
出韓長鸞以為珽黨亦欲出之屬車駕將適晉
陽季舒與張雕議以為壽春被圍大軍出拒信
使往還須稟節度兼道路小人或相驚恐去大
駕向并畏避南寇若不啓諫必動人情遂與從
駕文官連名進諫時貴臣趙彥深唐邕段孝言

等初亦同心臨時疑貳季舒與爭未決長鸞遂
奏去漢兒文官連名摠署聲去諫止向并其實
未必不反宜加誅戮帝即召已署官人集合章
殿以季舒張雕劉逖封孝琰裴澤郭遵等爲首
斬之殿庭長鸞令棄其屍於漳水自外同署將
加鞭撻趙彥深執諫獲免季舒等家屬男女徙
北邊妻女子婦配奚官小男下蠶室没入貲產
季舒大好醫術天保中於徙所無事更銳意研
精遂爲名手多所全濟雖位望轉高未曾解怠

縱貧賤廝養亦爲之療庶子長君尚書右丞兵部郎中次鏡玄著作佐郎並流於遠惡未幾季舒等六人妻以年老放出後南安王思好更稱朝廷罪惡以季舒等見害爲詞采名六人兄弟子姪隨軍趣晉陽事敗長君等並從戮六人妻又追入官周武帝滅齊詔斛律光與季舒等六人同被優贈季舒贈開府儀同大將軍定州刺史

史云

祖珽字孝徵范陽狄道人也父瑩魏護軍將軍

班神情機警言詞藻道逸少馳令譽爲世所推起
家祕書郎對策高第爲尚書儀曹郎中典儀注
嘗爲冀州刺史万俟受洛制清德頌其文典麗
由是神武聞之時文宣爲并州刺史署班開府
倉曹參軍神武口授班三十六事出而疏之一
無遺失大爲僚類所賞時神武送魏蘭陵公主
出塞嫁蠕蠕魏收賦出塞及公主遠嫁詩二首
班皆和之大爲時人傳詠班性踈率不能廉慎
守道倉曹雖云州局乃受山東課輸大文綬并

連珠孔雀羅等百餘疋令諸姬擲樗蒲調新曲
招城市年少歌儻爲娛遊諸倡家與陳元康穆
子容任胄元士亮等爲聲色之遊參軍元景獻
故尚書令元世雋子也其妻司馬慶雲女是魏
孝靜帝姑博陵長公主所生班忽迎景獻妻赴
席與諸人遞寢亦以貨物所致其豪縱淫逸如
此常云丈夫一生不負身已文宣罷州班例應
隨府規爲倉局之間致請於陳元康元康爲白
由是還任倉曹班又委體附參軍事攝典籤陸

子先并爲畫計請糧之際令子先宣教出粟十車爲寮官捉送神武親問之斑自言不受署歸罪子先神武信而釋之斑出而言曰此丞相天緣明鑒然實孝徵所爲性不羈放縱曾至膠東刺史司馬世雲家飲酒遂藏銅壘二面廚人請搜諸客果於斑懷中得之見者以爲深恥所乘老馬常稱騮駒又與寡婦王氏姦通每人前相聞往復裴讓之與斑卑狎於衆中嘲斑曰卿斑那得如此詭異老馬十歲猶號騮駒一妻耳順

尚稱娘子于時喧然傳之後爲神武中外府功
曹神武宴寮屬於坐失金叵羅竇太后令飲酒
者皆脫帽於班髻上得之神武不能罪也後爲
祕書丞領舍人事文襄州客至請賣華林遍略
丈襄多集書人一日一夜寫畢退其本曰不須
也班以遍略數秩質錢樗蒲文襄杖之四十又
與令史李雙倉督成祖等作晉州啓請粟三千
石代功曹參軍趙彥深宣神武教給城局參軍
過典籤事高景略疑其定不實密以問彥深彥

深荅都無此事遂被推檢班即引伏神武大怒
決鞭二百配甲坊加鉗其穀倍徵未及科會并
州定國寺新成神武謂陳元康温子昇曰昔作
芒山寺碑文時稱妙絕今定國寺碑當使誰作
詞也元康伯薦班才學并解鮮卑語乃給筆札
就禁所具二日內成其文甚麗神武以其工而
且速特恕不問然猶免官散參相府文襄嗣事
以爲功曹參軍及文襄遇害元康被傷創重倩
班作書屬家累事并去祖喜邊有少許物宜早

索取班乃不通此書喚祖喜私問得金二十五
錠唯與喜二錠餘盡自入己盜元康家書數千
卷祖喜懷恨遂告元康二弟叔謚季璩等叔謚
以語楊愔愔嘖眉荅曰恐不益亡者因此得停
文宣作相班擬補令史十餘人皆有受納據法
處絞上尋捨之又盜官遍略一部事發文宣付
從事中郎王士雅推檢并與平陽公淹令錄班
付禁勿令越逸淹遣田曹參軍孫子寬往喚班
受命便爾私逃黃門郎高德正副留臺事謀云

班自知有犯驚恐是常但宣一命向祕書稱奉并州約束須五經三部仰承親檢校催遣如此則班意安夜當還宅然後掩取班果如德正圖遂還宅薄晚就家掩之縛班送廷尉據犯枉法處絞刑文宣以班伏事先世諷所司命特寬其罰遂奏免死除名天保元年復被召從駕依除免例參於晉陽班天性聰明事無難學凡諸伎藝莫不措懷文章之外又善音律解四夷語及陰陽占候醫藥之術尤是所長文宣帝雖嫌其

數犯憲而愛其才伎令直中書省掌詔誥班通
密狀列中書侍郎陸元規勅令裴英推問元規
以應對忤旨被配甲坊除班尚藥丞尋遷典御
又奏造胡桃油復爲割截免官文宣每規之常
呼爲賊文宣崩普選勞舊除爲章武太守楊愔
等誅不之官授著作郎數上密啓爲孝昭所忿
勅中書門下二省斷班奏事班善爲胡桃油以
塗畫乃進之長廣王因言殿下有非常骨法孝
徵夢殿下乘龍上天王謂曰若然當使兄大富

貴及即位是爲武成皇帝擢拜中書侍郎帝於
後園使班彈琵琶和士開胡舞各賞物百段士
開忌之出爲安德太守轉齊郡太守以母老乞
還侍養詔許之會江南使人來聘爲中勞使尋
爲太常少卿散騎常侍假儀同三司掌詔誥初
班於乾明皇建之時知武成陰有大志遂深自
結納曲相祗奉武成於天保卅頻被責心常銜
之班至是希旨上書請追尊太祖獻武皇帝爲
神武高祖文宣皇帝改爲威宗景烈皇帝以悅

武成從之時皇后愛少子東平王儼願以爲嗣
武成以後主體正居長難於移易珽私於士開
曰君之寵幸振古無二宮車一日晚駕如欲何
以克終士開因求策焉珽曰宜說主上云襄宣
昭帝子俱不得立今宜命皇太子早踐大位以
定君臣若事成中宮少主皆德君此萬全計也
君此且微說令主上粗解珽當自外上表論之
士開許諾因有彗星出太史奏云除舊布新之
徵珽於是上書言陛下雖爲天子未是極貴按

春秋元命苞云乙酉之歲除舊革政今年太歲
乙酉宜傳位東宮令君臣之分早定且以上應
天道并上魏獻文禪子故事帝從之由是拜祕
書監加儀同三司大被親寵既見重二宮遂志
於宰相先與黃門侍郎劉逖友善乃疏侍中尚
書令趙彥深侍中和士開罪狀令逖奏之逖懼
不敢通其事頗泄彥深等先詣帝自陳大怒執
班詰曰何故毀我士開班因厲聲曰臣由士開
得進本無欲毀之意陛下今既問臣臣不敢不

以實對士開文遙彥深等專弄威權控制朝廷
與吏部尚書尉瑾內外交通共爲表裏賣官鬻
獄政以賄成天下訶謠若爲有識所知安可聞
於四裔陛下不以爲意臣恐大齊之業隳矣帝
曰爾乃誹謗我玠曰不敢誹謗陛下取人女帝
曰我以其儉餓故收養之玠曰何不開倉賑給
乃買取將入後宮乎帝益怒以刀環築口鞭杖
亂下將撲殺之大呼曰不殺臣陛下不得名若
欲得名莫殺臣爲陛下合金丹遂少獲寬放玠

又曰陛下有一范曾不用知可如何帝又怒曰
爾自作范曾以我爲項羽邪班曰項羽人身亦
何由可及但天命不至耳項羽布衣率烏合衆
五年而成霸王業陛下藉父兄資財得至此臣
以項羽未易可輕臣何止方於范曾縱張良亦
不能及張良身傳太子由因四皓方定漢嗣臣
位非輔弼踈外之人竭力盡忠勸陛下禪位使
陛下尊爲太上子居宸宸於已及子俱保休祚
葛爾張良何足可數帝愈恚令以土塞其口班

且吐且言無所屈撓乃鞭二

甲坊尋徙於

光州刺史李祖勳遇之甚厚別駕張奉禮希大
臣意上言班雖爲流囚常與刺史對坐勅報曰
牢掌奉禮曰牢者地牢也乃爲深坑置諸內苦
加防禁桎梏不離其身家人親戚不得臨視夜
中以蕪菁子燭熏眼因此失明武成崩後主憶
之就除海州刺史是時陸令萱外干朝政其子
穆提婆愛幸班乃遺陸媪弟悉達書曰趙彥深
心腹深沉欲行伊霍事儀同姊弟豈得平安何

不早用智士邪和士開亦以珽能決大事欲以
爲謀主故棄除舊怨虚心待之與陸媪言於帝
曰襄宣昭三帝其子皆不得立今至尊猶在帝
位者實猶祖孝徵此人有大功宜報重恩孝徵
心行雖薄竒略出人緩急真可憑仗且其雙盲
必無反意請喚取問其謀計從之入爲銀青光
祿大夫秘書監加開府儀同三司和士開死後
仍說陸媪出彥深以珽爲侍中在晉陽通密啓
請誅琅邪其計旣行漸被任遇又太后之被幽

也班欲以陸媪為太后撰魏帝皇太后故事為
太姬言之謂人曰太姬雖云婦人寔是雄傑女
媪已來無有也太姬亦稱班為國師國寶猶是
拜尚書左僕射監國史加特進入文林館摠監
撰書封燕郡公食太原郡幹給兵七十人所住
宅在義井坊旁拓隣居大事脩築陸媪自往案
行勢傾朝野斛律光甚惡之遙見竊罵去多事
乞索小人欲行何計數常謂諸將去邊境消息
處分兵馬趙令嘗與吾等參論之盲人掌機密

來全不共我輩語止恐悞他國家事又班頗聞
其言因其女皇后無寵以謠言聞上曰百外飛
上天明月照長安令其妻兄鄭道蓋奏之帝問
班證實又說謠云高山崩榭樹舉盲老翁背上
下大斧多事老母不得語班并云盲老翁是臣
女與國同憂戚勸上行語其多事老母以道女
侍中陸氏帝以問韓長鸞穆提婆并令高元海
段士良密議之衆人未從因光府軍封士讓啓
告光反遂滅其族班又附陸媪求爲領軍後主

許之詔須覆奏取侍中斛律孝卿署名孝卿密告高元海語侯呂芬穆提婆云孝徵漢兒兩眼又不見物豈合作領軍也明旦面奏具陳班不合之狀并書班與廣寧王孝珩交結無大臣體班亦見帝令引入班自分踈并與元海素相嫌必是元海譖臣帝弱顏不能諱曰然班列元海共司農卿尹子華太府少卿李叔元平準令張叔略等結朋樹黨遂除子華仁州刺史叔元襄城郡太守叔略南營州錄事參軍陸媪又唱和

之復除元海鄭州刺史班自是專主機衡揔知
騎兵外事內外親戚皆得顯位後主亦令中要
數人扶侍出入著紗帽直至永巷出萬春門向
聖壽堂每同御榻論史政事委任之重羣臣莫
比自和士開執事以來政體隳壞班推崇高望
官人稱職內外稱美復欲增損政務沙汰人物
始奏罷京畿府併於領軍連百姓皆歸郡縣宿
衛都督等號位從舊官名文武章服並依故事
又欲黜諸閹豎及羣小輩推誠朝廷爲致治之

方陸媪穆提婆議頗同異玘乃諷御史中丞麗
伯律令劾主書王子冲納賂知其事連穆提婆
欲使贓罪相及望因此坐并及陸媪猶恐後主
溺於近習欲因后黨爲援請以皇后兄胡君瑜
爲侍中中領軍又徵君瑜兄梁州刺史君璧欲
以爲御史中丞陸媪聞而懷怒百方排毀即出
君瑜爲金紫光祿大夫解中領軍君璧還鎮梁
州皇后之廢頗亦由此王子冲釋而不問玘日
益以踈又諸宦者更共譖毀之無所不至後主

問諸太姬憫嘿不對及三問乃下牀拜曰老婢
合死本見和士開道孝徵多才博學言爲善又
故舉之此來看之極是罪過人實難知老婢合
死後主令韓長鸞爲檢案得出勅受賜十餘事以
前與其重誓不殺遂解班侍中僕射出爲北徐
州刺史班求見後主韓長鸞積嫌於班遣人推
出栢閣班故求面見坐不肯行長鸞乃令軍士
牽曳而出立班於朝堂大加誚責上道後令追
還解其開府儀同郡公直爲刺史至州會有陳

寇百姓多反班不關城門守埤者皆令下城靜
坐街巷禁斷行人雞犬賊無所聞見者不測所
以疑惑人走城空不設警備班忽然令大叫鼓
譟聒天賊大驚登時走散後復結陳向城班乘
馬自出令錄事參軍王君植率兵馬乃親臨戰
賊先聞其旨謂爲不能拒抗忽見親在戎行彎
弧縱鏑相與驚怪畏之而罷時穆提婆憾之不
已欲令城陷沒賊雖知危急不追班且戰且守
十餘日賊音奔走城卒保全卒於州子君信涉

獵書史多諸雜藝位兼通直散騎常侍聘陳使
副中書郎珽出亦見廢免君信弟君彥容貌短
小言辭澁訥少有才學隋大業中位至東平郡
書佐郡陷翟讓因爲李密所得密甚禮之署爲
記室軍書羽檄皆成其手及密敗爲王世充所
殺珽弟孝隱亦有文學早知名詞章雖不逮兄
亦機警言有辯兼解音律魏末爲散騎常侍迎梁
使時徐君房庾信來聘名譽甚高魏朝聞而重
之接對者多取一時之秀盧元景之徒並降階

攝職更遞司賓孝隱少處其中物議稱美孝隱
從父弟茂頗有辭情然好酒性率不爲時重大
寧中以經學爲本鄉所薦除給事以疾辭仍不
復仕班受任寄故令呼茂茂不獲已暫來就之
班欲爲官茂乃逃去班族弟崇儒少學有辭藻
幹局知名武平末司州別駕通直常侍入周爲
容昌郡太守隋開皇初終宕州長史

列傳第三十二

北齊書四十

隋太子通事舍人李

百藥

撰

尉瑾

馮子琮

赫連子悅

唐邕

白建

尉瑾字安仁父慶賓爲魏肆州刺史瑾少而敏悟
好學慕善稍遷直後司馬子如執政瑾取其外

生皮氏女由此擢拜中書舍人既是子如姻戚
數往參詣因與先達名輩微相款狎世宗入朝
因命瑾在鄴北宮共高德正典機密肅宗輔政
累遷吏部尚書世祖踐祚趙彥深本子如賓僚
元文遙和士開並帝鄉故舊共相薦達任遇彌
重又吏部銓衡所歸事多秘密由是朝之幾事
頗亦預聞尋兼右僕射攝選未幾即真病卒世
祖方在三臺飲酒文遙奏聞遂命徹樂罷飲瑾
外雖通顯內闕風訓閨門穢雜爲世所鄙然亦

能折節下士意在引接名流但不別之及官高
任重便大躁急省內郎中將論事者逆即瞋言
不可諮承既居大選彌自驕很子德載嗣

馮子琮信都人北燕主馮跋之後也父靈紹度
支郎中子琮性聰敏涉獵書傳爲肅宗除領軍

府法曹典機密攝庫部肅宗曾閱簿領試令口

陳子琮闇對無有遺失子琮妻胡皇后妹也遷

殿中郎加東宮管記又奉別詔令共胡長粲輔

導太子轉庶子天統元年世祖禪位後主世祖

御正殿謂子琮曰少君左右宜得正人以卿心
存正直今以後事相委除給事黃門侍郎領主
衣都統世祖在晉陽旣居舊殿少帝未有別所
詔子琮監造大明宮宮成世祖親自巡幸怪其
不甚宏麗子琮對曰至尊幼年纂承大業欲令
敦行節儉以示萬邦兼此北連天闕不宜過復
崇峻世祖稱善及世祖崩僕射和士開先恠侍
疾祕喪三日不發子琮問士開不發喪之意士
開引神武文襄初崩並祕喪不舉至尊年少恐

王公有貳心意欲普建集涼風堂然後與公詳
議時太尉錄尚書事趙郡王叡先恒居內預帷
幄之謀子琮素知士開忌叡及領軍臨淮王婁
定遠恐其矯遺詔出叡外任奪定遠禁衛之權
因荅云大行神武之子今上又是先皇傳位羣
臣富貴者皆是至尊父子之恩但今在內貴臣
一無改易王公已下必無異望世異事殊不得
與霸朝相比且公出宮門已經數日升遐之事
行路皆傳久而不舉恐有他變於是乃發喪元

文選以子琮太后妹夫恐其獎成太后干政說
趙郡王及士開出之拜鄭州刺史即令之任子
琮除州非後主本意中旨殷勤特給後部鼓吹
加兵五十人并聽將物度關至州未幾太后爲
齊安王納子琮長女爲妃子琮因請假赴鄴遂
授吏部尚書其妻恃親放縱請謁公行賄貨填
積守宰除授先定錢帛多少然後奏聞其所通
致事無不允子琮亦不禁制俄遷尚書左僕射
仍攝選和士開居要日久子琮舊所附託卑辭

曲躬事事謚稟士開弟休與盧氏婚子琮檢校
趨走與士開府寮不異是時內官除授多由士
開奏擬子琮旣恃內戚兼帶選曹自擅權寵頗
生間隙琅邪王儼殺士開子琮與其事就內省
絞殺之子琮微有識監及位望轉隆宿心頓改
擢引非類以爲深交縱其子弟官位不依倫次
又專營婚媾歷選上門例以官爵許之旬日便
驗子慈正

赫連子悅字士欣勃勃之後也魏永安初以軍

功爲濟州別駕及高祖起義侯景爲刺史景本
尔朱心腹子悅勸景起義景從之除林慮守世
宗往晉陽路由是郡因問所不便悅荅云臨水
武安二縣去郡遙遠山嶺重疊車步艱難若東
屬魏郡則地平路近世宗笑曰卿徒知便民不
覺損幹子悅荅云所言曰民疾苦不敢以私潤
負心世宗云卿能如此甚善甚善仍勅依事施
行在郡滿更徵爲臨漳令後除鄭州刺史于時
新經河清大水民多逃散子悅親加恤隱戶口

益增治爲天下之最入爲都官尚書鄭州民八
百餘請立碑頌德有詔許焉後以本官兼吏部
子悅在官唯以清勤自守旣無學術又闕風儀
人倫清鑒去之彌遠一旦居銓衡之首大招物
議由是除太常卿卒

唐邕字道和太原晉陽人其先自晉昌徙焉父
靈芝魏壽陽令邕少明敏有治世才具太昌初
或薦於高祖命其直外兵曹典執文帳邕善書
計彊記默識以幹濟見知擢爲世宗大將軍府

參軍及世宗崩事出倉卒顯祖部分將士鎮壓
四方夜中召邕支配造次便了顯祖甚重之顯
祖頻年出塞邕必陪從專掌兵機識悟閑明承
變敏速自督將以還軍吏以上勞効由緒無不
諳練每有顧問占對如響或於御前簡閱雖三
五千人邕多不執文簿暗唱官位姓名未常謬
誤七年於羊汾堤講武令邕摠爲諸節度事畢
仍監宴射之禮是日顯祖親執邕手引至太后
前坐於丞相斛律金之上啓太后云唐邕彊幹

一人當千仍別賜錦綵錢帛邕非唯彊濟明辨
然亦善揣上意進取多途是以恩寵日隆委任
彌重顯祖又嘗對邕白太后云唐邕分明彊記
每有軍機大事手作文書口且處分耳又聽受
實是異人一日之中六度賜物又嘗解所服青
鼠皮裘賜邕云朕意在車馬衣裘與卿共弊十
年從幸晉陽除兼給事黃門侍郎領中書舍人
顯祖嘗登童子佛寺望并州城曰此是何等城
或曰此是金城湯池天府之國帝云我謂唐邕

是金城此非金城也其見重如此其後語邕曰
卿劬勞既久欲除卿作州頻勅楊遵彥更求一
人堪代卿者遵彥云比遍訪文武如卿之徒實
不可得所以遂停此意卿宜勉之顯祖或時切
責待臣不稱旨者觀卿等舉措不中與唐邕作
奴其見賞遇多此類肅宗作相除黃門侍郎於
華林園射特賜金帶寶器服玩雜物五百種天
統初除侍中并州大中正又拜護軍餘如故邕
以軍民教習田獵依令十二月別三圍以爲

人馬疲弊奏請每月兩圍世祖從之後出爲趙
州刺史餘官如故世祖謂邕曰朝臣未有帶侍
中護軍中正作州者以卿故有此舉放卿百餘
日休息至秋間當即追卿遷右僕射又遷尚書
令封晉昌王錄尚書事屬周師來寇丞相高阿
那肱率兵赴援邕配割不甚從允因此有隙肱
譖之遣侍中斛律孝卿宣旨責讓留身禁止尋
釋之車駕將幸晉陽勅孝卿揔知騎兵度支事
多自決不相詢稟邕自侍從霸朝以來常典樞

要麻事六帝恩遇甚重一旦爲孝卿所輕負氣
鬱快形於辭色帝平陽敗後狼狽還鄴都邕懼
那肱譖之恨斛律孝卿輕已遂留晉陽與莫婁
敬顯等崇樹安德王爲帝信宿城陷邕遂降周
依例授儀同大將軍卒於鳳州刺史邕性識明
敏通解時事齊氏一代典執兵機凡是九州軍
士四方勇募彊弱多少番代往還及器械精麤
糧儲虛實精心勤事莫不諳知自大寧以來奢
侈糜費比及武平之末府藏漸虛邕度支取捨

大有裨益然既被任遇意氣漸高其未經府寺
陳訴越覽詞牒條數甚多俱爲憲臺及左丞彈
糾並御注放免司空從事中郎封長業太尉記
室參軍平濤並爲徵官錢違限邕各杖背二十
齊時宰相未有撻撻朝士者至是甚駭物聽邕
三子長子君明開府儀同三司開皇初卒於應
州刺史次子君徹中書舍人隋順戎二州刺史
大業中卒於武賁郎將少子君德以邕降周伏
法齊朝因高祖作丞相府外兵曹騎兵曹分掌

兵馬及天保受禪諸司監咸歸尚書唯此二曹
不廢令唐邕白建主治謂之外兵省其後邕建
位望轉隆各爲省主令中書舍人分判二省事
故世稱唐白云

白建字彥舉太原陽邑人也初入大丞相府騎兵
曹曲執文帳明解書計爲同局所推天保十年
兼中書舍人肅宗輔政除大丞相騎兵參軍河
清三年突厥入境代忻二牧悉是細馬合數萬
匹在五臺山北栢谷中避賊退後勅建就彼檢

校續使人詣建間領馬送定州付民養飼建以
馬久不得食瘦弱遠送恐多死損遂違勅以便
宜從事隨近散付軍人啓知勅許焉戎乘無損
建有力焉武平末歷特進侍中中書令建雖無
他才勤於在公屬王業始基戎寄爲重建與唐
邕俱以典執兵馬致位卿相晉陽國之下都每
年臨幸徵詔差科責成州郡本藩寮佐爰及守
宰諮承陳請趨走無暇諸子幼稚俱爲州郡主
簿新君選補必先召辟男婚女嫁皆得勝流當

列傳第三十三

北齊書四十一

隋太子通事舍人李

百藥撰

暴顯

皮景和

鮮于世榮

綦連猛

元景安

獨孤永業

傅伏

高保寧

暴顯字思祖魏郡丘丘人也祖喟魏琅邪太守
朔州刺史因家邊朔父誕魏恒州刺史左衛將
軍樂安公顯幼時見一沙門指之曰此郎子有
好相表大必爲良將貴極人臣語終失僧莫知
所去顯少經軍旅善於騎射曾從魏孝莊帝出
獵一日之中手獲禽獸七十二孝昌二年除羽林
監中興元年除襄威將軍晉州車騎府長史後
從高祖於信都舉義授中堅將軍散騎侍郎帳內

大都督加安東將軍銀青光祿大夫屯留縣開國
侯天平二年除渤海郡守元象元年除雲州大中
正兼武衛將軍加鎮東將軍二年除北徐州刺史
當州大都督從高祖與西師戰於邛山高祖令顯
守河橋鎮據中澗城武定二年除征南將軍廣州
刺史侯景反於河南爲景所攻顯率左右二十餘
騎突出賊營拔難歸國時高岳慕容紹宗等
即配顯士馬隨岳等破景於渦陽武定六年拜太
府卿從世宗平王思政於潁川授潁州刺史七年

轉鄭州刺史八年加驃騎將軍進侯爲公通前食
邑二千三百戶天保元年加衛大將軍刺史如故
三年與清河王高岳襲歷陽取之爲贓貨解鄭
州大理禁止處斷未訖爲合肥被圍遣與步汗薩
慕容儼等同攻梁北徐州擒刺史王彊梁秦州刺
史嚴超達戰於涇城破之五年授儀同三司其年又
與高岳南臨漢水攻下梁西楚州獲刺史許法光于
時梁將蕭循與侯瑱等圍慕容儼於郢州復以
顯爲水軍大都督從攝口入江救之師還加開府儀

同三司賞帛五百疋十年食幽州范陽郡幹乾
明元年除車騎大將軍皇建元年轉封樂安郡
開國公二年除趙州刺史河清元年遷洛州刺
史二年復除朔州刺史秩滿歸天統元年加特
進驃騎大將軍封定陽王四年卒年六十六

皮景和琅邪下邳人也父慶賓魏淮南王開府
中兵叅軍事正光中因使懷胡遇世亂因家廣
寧之石門縣景和少通敏善騎射初以親信事
高祖後補親信副都督武定二年征步落稽世

宗疑賊有伏兵令景和將五六騎深入一谷中值賊百餘人便共格戰景和射數十人莫不應弦而倒高祖嘗令景和射一野豕一箭而獲之深見嗟賞除庫直正都督天保初授假節通剌史封永寧縣開國子後從襲庫莫奚加左右大都督又從度黃龍征契丹定稽胡尋從討茹茹主菴羅辰於陁北又從平茹茹餘燼景和趨捷有武用每有戰功十年食安樂郡幹乾明元年除武衛將軍兼給事黃門侍郎肅宗作相

以本官攝大丞相府從事中郎大寧元年除儀
同三司散騎常侍武衛大將軍尋加開府二年
出爲梁州刺史三年突厥圍逼晉陽令景和馳
驛赴京督領後軍赴并州未到間賊已退仍除領
左右大將軍食齊郡幹又除并省五兵尚書天
統元年遷殿中尚書二年除侍中景和於武職
之中兼長吏事又性識均平故頻有美授周通
好之後冠蓋往來常令景和對接每與使人同射
百發百中甚見推重武平中詔獄多令中黃門

等監治恒令景和按覆據理執正由是過無枉
濫後除特進中領軍封廣漢郡開國公又隨斛
律光率衆西討剋姚白亭二城別封永寧郡開
國公又除領軍將軍又從軍拔宜陽城封開封
郡開國公琅邪王之殺和士開也兵指西闕內
外惶惑莫知所爲景和請後主出千秋門自號
令事平除尚書右僕射趙州刺史尋遷河南
行臺尚書右僕射洛州刺史陳將吳明徹寇淮
南令景和率衆拒之除領軍大將軍封文城郡王

轉食高陽郡幹軍至祖口值土人陳暄等作
亂景和平之又有陽平人鄭子饒詐依佛道設
齊會用米麵不多供贍甚廣密從地藏漸出餅
飯愚人以為神力見信於魏衛之間將為逆亂
謀泄掩討漏逸乃潛度河聚衆數千自號長樂
王已破乘氏縣又欲襲西兗州城景和自南兗
州遣騎數百擊破之斬首二千餘級生擒子饒
送京師烹之及吳明徹圍壽陽勅令景和與賀
拔伏恩等赴救景和以尉破胡軍始喪敗怯懦不

敢進頓兵淮口頻有勅使催促然始度淮屬壽
陽已陷狼狽北還器械軍資大致遺失陳將蕭
摩訶率步騎於淮北倉陵城截之景和得整旅
逆戰摩訶退歸是時拒吳明徹者多致傾覆唯
景和全軍而還由是獲賞除尚書令別封西河郡開
國公賜錢二十萬酒米十車時陳人聲將度淮
令景和停軍西兗州爲拒守節度武平六年病卒
年五十五贈侍中使持節都督定常朔幽定平
六州諸軍事太尉公錄尚書事定州刺史長

子信機悟有風神微涉書傳武平末開府儀同
三司武衛將軍於勳貴子弟之中稱其識鑒於
并州降周軍授上開府軍正大夫隋開皇中卒
於洮州刺史少子宿達武平末太子齋帥有才
藻檢行開皇中通事舍人丁母憂起復將赴京
辭靈慟哭而絕久而獲蘇不能下食三日致死
鮮于世榮漁陽人也父寶業懷朔鎮將武平初
贈儀同三司祠部尚書朔州刺史世榮少而沉
敏有器幹興和二年為高祖親信副都督稍遷平

西將軍賜爵石門縣子後頻從顯祖討茹茹
破稽胡又從高岳平郢州除持節河州刺史食
朝歌縣幹尋為肅宗丞相府諮議叅軍皇建中
除儀同三司武衛將軍天統二年加開府又除
鄭州刺史武平中以平信州賊除領軍將軍轉
食上黨郡幹從平高思好封義陽王七年後主
幸晉陽令世榮以本官判尚書右僕射事貳北
平王北宮留後尋有勅令與吏部尚書袁聿修
在尚書省檢試舉人為乘馬至雲龍門外入省

北門爲憲司舉奏免官後主圍平陽除世榮領軍
將軍周師將入鄴除領軍大將軍太子太傅於
城西拒戰敗被擒爲周武所殺世榮雖武人無文
藝以朝危政亂每竊歎之見徵稅無厭賜與過
度發言歎惜子子貞武平末假儀同三司

綦連猛字武兒代人也其先姬姓六國末避亂
出塞保祁連山因以山爲姓北人語訛故曰綦
連氏父元成燕郡太守猛少有志氣便習弓
馬永安三年尔朱榮徵爲親信至洛陽榮被

害即從尔朱世隆出奔建州仍從尔朱兆入洛
其年又從兆討紇豆陵步藩補都督普泰元年
加征虜將軍中散大夫猛父母兄弟皆在山東
尔朱京纏欲投高祖謂猛曰王以尔父兄皆在
山東每懷不信尔若不走今夜必當殺尔可走
去猛以素蒙兆恩拒而不從京纏曰我今亦欲去
尔從我不猛又不從京纏乃舉稍曰尔不從我
必刺尔猛乃從之去城五十餘里即背京纏復歸
尔朱及兆敗乃歸高祖高祖問曰尔朱京纏將尔投

我尔中路背去何也猛乃具陳服事之理不可
貳心高祖曰尔莫懼服事人法湏如此遂補都
督步落稽等起逆在覆金山使猛討之大捷特
被賞賚元象元年從高祖向河陽與周文帝戰
於邙山二年除平東將軍中散大夫其年又轉
中外府帳內都督賞邙山之功封廣興開國君
五年梁使來聘云有武藝求訪北人欲與相角
世宗遣猛就館接之雙帶兩鞬左右馳射兼共
試力挽彊梁人引弓兩張力皆三石猛遂併取四

張疊而挽之過度梁人嗟服之其年除撫軍
將軍別封石城縣開國子食肆州平寇縣幹天
保元年除都督東秦州刺史別封雍州京兆郡
覆城縣開國男從顯祖討契丹大獲戶口又隨
斛律敦北征茹茹敦令猛輕將百騎深入覘候
還至白道與軍相會因此追躡遂大破之賚帛
三百段七年除武衛將軍儀同三司九年轉武
衛大將軍乾明初加車騎大將軍皇建元年封
石城郡開國伯尋進爵爲君二年除領左右大

將軍從肅宗討奚賊大捷獲馬二千疋牛羊三
萬頭河清二年加開府突厥侵逼晉陽勅猛將三
百騎覘賊遠近行至城北十五里遇賊前鋒以
敵衆多遂漸退避賊中有一驍將超出來鬪
猛遙見之即亦挺身獨出與其相對俯仰之間
刺賊落馬因即斬之三年別封武安縣開國
君加驃騎大將軍天統元年遷右衛大將軍乃
奉世祖勅恒令在嗣主左右兼知內外機要之
事三年除中領軍四年轉領軍將軍別封義寧

縣開國君五年除并省尚書左僕射餘如故
除并省尚書令領軍大將軍封山陽王猛自和
士開死後漸預朝政疑議與奪咸亦咨稟趙彥
深以猛武將之中頗疾茲佞言議時有可采故
引知機事祖珽既出彥深以猛為趙之黨與乃
除光州刺史已發至牛蘭忽有人告和士開被
害日猛亦知情遂被追止還入內禁留簿錄家口
尋見釋削王爵止以開府赴州在任寬惠清
慎吏民稱之淮陰王阿那肱與猛有舊每欲攜

引之曾有勅徵詣闕似欲禾女寄韓長鸞等
沮難復除膠州刺史尋徵還令在南充防捍後主平
陽敗還又徵赴鄴除大將軍齊亡入周尋卒

元景安魏昭成五世孫也高祖虔魏陳留王
父永少爲奉朝請自積射將軍爲元天穆
薦之於尔朱榮參立孝莊之謀賜爵代郡公
加將軍太中大夫二夏幽三州行臺左丞持節
招納降戶四千餘家榮又啓封永朝那縣子
邑三百戶持節南幽州刺史假撫軍將軍天平

初高祖以爲行臺左丞尋除潁川刺史又爲北揚州刺史天保中徵拜大司農卿遷銀青光祿大夫依例降爵爲乾鄉男大寧二年遷金紫光祿大夫景安沉敏有幹局少工騎射善於事人釋褐朱榮大將軍府長流參軍加寧遠將軍又轉榮大丞相府長流參軍高祖平洛陽領軍婁昭薦補京畿都督父永啓迴代郡公授之加前將軍太中大夫隨武帝西入天平末大軍西討景安臨陣自歸高祖嘉之即補都督興和中轉

領親信都督邛山之役力戰有功賜爵西華縣都鄉男代郡公如故世宗入朝景安隨從在鄴于時江南欵附朝貢相尋景安妙閑馳騁雅有容則每梁使至恒令與斛律光皮景和等對客騎射見者稱善世宗嗣事啓滅國封分錫將士封石保縣開國子邑三百戶加安西將軍又授通州刺史加鎮西將軍轉子爲伯增邑通前六百戶餘如故天保初加征西將軍別封興勢縣開國伯帶定襄縣令賜姓高氏三年從破庫莫奚於代

川轉領左右大都督餘官並如故四年從討契丹於黃龍領北平太守後頻從駕再破茹茹遷武衛大將軍又轉領左右大將軍兼七兵尚書時初築長城鎮戍未立突厥強盛慮或侵邊仍詔景安與諸軍緣塞以備守督領既多且所部軍人富於財物遂賄貨公行顯祖聞之遣使推檢同行諸人贓汗狼籍唯景安纖毫無犯帝深嘉歎乃詔有司以所聚斂贓絹伍百疋賜之以彰清節又轉都官尚書加儀同三司食高平

郡幹又拜儀同三師乾明元年轉七兵尚書加車
騎大將軍皇建元年又兼侍中馳驛詣鄴慰勞
百司巡省風俗肅宗曾與羣臣於西園醮射文
武預者二百餘人設侯去堂百四十餘步中的
者賜與良馬及金玉錦綵等有一人射中獸頭
去鼻寸餘唯景安最後有一矢未發帝令景安
解之景安徐整容儀操弓引滿正中獸鼻帝嗟
賞稱善特賚馬兩疋玉帛雜物又加常等大
寧元年加開府二年轉右衛將軍尋轉右衛大

將軍天統初判并省尚書右僕射尋出爲徐州
刺史四年除豫州道行臺僕射豫州刺史加開府
儀同三司武平三年進授行臺尚書令刺史如故封歷
陽郡王景安之在邊州鄰接他境綏和邊鄙不相
侵暴人物安之又管內蠻多華少景安被以威恩咸
得寧輯比至武平末招慰生蠻輸租賦者數万
戶六年徵拜領軍大將軍入周以大將軍大義郡開
國公率衆討稽胡戰没子仁武平末儀同三司武
衛隋驃騎將軍卒於丹陽太守初永兄祚襲

爵陳留王祚卒子景皓嗣天保時諸元帝室
親近者多被誅戮疏宗如景安之徒議欲請姓
高氏景皓去豈得棄本宗逐他姓大丈夫寧可
玉碎不能瓦全景安遂以此言白顯祖乃收景
皓誅之家屬徙彭城由是景安獨賜姓高氏自
外聽從本姓永弟种子豫字景豫美姿儀有
器幹永安中羽林監元顥入洛以守河內功賜
爵永安君後爲濮陽郡守魏彭城王韶引爲開
府諮議參軍韶出鎮定州啓爲定州司馬及

景安告景皓慢言引豫言相應和豫占云亦時
以衣袖掩景皓曰云兄莫妄言及問景皓與豫所
列符同獲免自外同聞語者數人皆流配遠方
豫卒於徐州刺史

獨孤永業字世基本姓劉中山人母改適獨孤
氏永業幼孤隨母爲獨孤家所育養遂從其
姓焉止於軍士之中有才幹便弓馬被簡擢補
定州六州都督宿衛晉陽或稱其有識用者世
宗與語悅之超授中外府外兵參軍天保初除中

書舍人豫州司馬永業解書計善歌舞甚為顯
祖所知乾明初出為河陽行臺右丞遷洛州刺
史又轉左丞刺史如故加散騎常侍宜陽深在
敵境周人於黑澗築城戍以斷糧道永業亦築
鎮以抗之治邊甚有威信遷行臺尚書至河清三
年周人寇洛州永業恐刺史段思文不能自固
馳入金墉助守周人為土山地道曉夕攻戰經
三旬大軍至寇乃退永業又在河南善於招撫
歸降者萬計選其二百人為爪牙每先鋒以寡

敵衆周人憚之加儀同三司賞賜甚厚性鯁直
不交權勢斛律光求二婢弗得毀之於朝廷河
清末徵爲太僕卿以乞伏貴和代之於是西境
蹙弱河洛人情騷動武平三年遣永業取斛
律豐洛因以爲北道行臺僕射幽州刺史尋徵
爲領軍將軍河洛民庶多思永業朝廷又以
疆場不安除永業河陽道行臺僕射洛州刺
史周武帝親攻金墉永業出兵禦之問曰是何
達官作何行動周人曰至尊自來主人何不出

看客永業曰客行忽速是故不出乃通夜辦馬
槽二千周人聞之以爲大軍將至乃解圍去永業
進位開府封臨川王有甲士三萬初聞晉州敗請
出兵北討奏寢不報永業慨憤又聞并州亦陷
爲周將常山公所逼乃使其子須達告降於周
周武授永業上柱國宣政末出爲襄州總管大
象二年爲行軍總管崔彥睦所殺

傅伏太安人也父元興儀同北蔚州刺史伏少從
戎以戰功稍至開府水橋領民大都督周帝前攻

河陰伏自橋夜渡入守中潭城南城陷被圍二旬不下救兵至周師還伏謂行臺乞伏貴和曰賊已疲弊願得精騎二千追擊之可捷也貴和弗許武平六年除東雍州刺史會周兵來逼伏出戰却之周尅晉州執獲行臺尉相貴以之招伏伏不從後主親救晉州以伏爲行臺右僕射周軍來掠伏擊走之周克并州遣韋孝寬與其子世寬來招伏曰并州已平故遣公覓來報便宜急下授上大將軍武鄉郡開國公即給告身以金馬礪二酒

鍾為信伏不受謂孝寬曰事君有死無貳此兒
為臣不能竭忠為子不能盡孝人所讎疾願即
斬之以號令天下周帝自鄴還至晉州遣高阿
那肱等百餘人臨汾召伏伏出軍隔水相見問
至尊今在何處阿那肱曰已被捉獲別路入關
伏仰天大哭率眾入城於廳事前北面哀號良
久然後降周帝見之曰何不早下伏流涕而對
曰臣三世蒙齊家衣食被任如此革命不能自
死羞見天地周帝親執其手曰為臣當若此朕平

齊國唯見公一人乃自食一羊肋以骨賜伏曰
骨親肉踈所以相付遂別引之與同食令於侍伯
邑宿衛授上儀同勅之曰若即與公高官恐歸
投者心動努力好行無慮不富貴夏問前救河陰
得何官職伏曰蒙一轉授特進永昌郡開國公
周帝謂後主曰朕前三年教習兵馬決意往取
河陰正為傳伏能守城不可動是以收軍而退
公當時賞授何其薄也賜伏金酒卮後以為岷
州刺史尋卒齊軍晉州敗後兵將罕有全節者

其殺身成仁者有儀同叱于苟生鎮南兗州
周帝破鄴赦書至苟生自縊死又有開府中
侍中官者田敬宣本字鵬舉人也年十四五便
好讀書既爲闍寺伺隙便周章詢請每至文
林館氣喘汗流問書之外不暇他語及視古人
節義事未嘗不感激沈吟顏之推重其勤學
甚加開獎後遂通顯後主之奔青州遣其西出
參伺動靜爲周軍所獲問齊主何在給云已去
歐捶服之每折一支辭色愈厲竟斷四體而卒

又有雷顯和晉州敗後爲建州道行臺左僕射
周帝使其子招焉顯和禁其子而不受聞鄴
城敗乃降後主矢并州使開府紇奚永安告急於
突厥他鉢略可汗及聞齊滅他鉢處永安於吐
谷渾使下永安抗言曰本國旣敗永安豈惜賤
命欲閉氣自絕恐天下不知大齊有死節且唯
乞一刀以顯示遠近他鉢嘉其壯烈贈馬七十
匹而歸

高保寧代人也不知其所從來武平末爲營州

刺史鎮黃龍夷夏重其威信周師將至鄴幽
州行臺潘子晃徵黃龍兵保寧率驍銳并契
丹秣羯萬餘騎將赴救至北平知子晃以發薊
又聞鄴都不守便歸營周帝遣使招慰不受勅
書范陽王紹信在突厥中上表勸進范陽署
寶寧爲丞相及盧昌期據范陽城起兵寶寧
引紹信集夷夏兵數萬騎來救之至潞河知周
將宇文神舉已屠范陽還據黃龍竟不臣周
史臣曰皮景和等爰自霸基策名戎幕間關

